



Uunga siunnersuut: Arnanut nakuusertarneq angerlarsimaffinnilu nakuusertarneq pitsaaliorniarlugit akiorniarlugillu Europarådip isumaqatigiissutaanik (Istanbulimi isumaqatigiissummik) Kalaallit Nunaanni Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut

(Meeqqanut, Inuusuttunut Ilaqutariinnullu Naalakkersuisoq)

Siullermeernera

Nakuusertarnerup pitsaaliorneqarnissaa akiorniarneqarnissaalu Naalakkersuisut anguniagassatut takorluugaasa annersaasut ilagigaat tusarluarnarpoq, tassami ullutsinni ulluinnarni angerlarsimaffimmi nakuuserfiusuni innuttaasut ilaat inuupput ilaatigullu isiginnaartunik meerartaqartarlutik nakuusernermilu ilai eqqugaasarlutik, taamaammat qujanarpoq UKA 2021/146 Kalaallit Nunaata istanbulimi isumaqatigiissut akuersissutiginissaanut siunnersuummik qaqitsisoqarmat, taamalilluni kingunerana una aalajangiiffigisassatut siunnersuut.

Uagut kalaallit nakuuserneq akiorniarnerani tamatta akisussaaqataajaqarpugut, tamattalu iliuuseqartariaqarluta. Tassami ulluinnarni qanorluunniit inoqatitsinnut ingammi meeqqanut maligassiuilluanngikkutta periuseq tamanna qimakkuminaattussaassaaq. Taamaammat sutigit tamatigit nakuuserneq akiorniarneranut suleqataasariaqarpugut Kalaallit inuiattut inuiaqatigiit illersussagutsigit. Tamattami nakuusertarneq akuerineqarsinnaanngilluinnartutut isigaarput. Soormi taava Kalaallit tamatta suleqatigiinnianngilagut, soormi inuiaqatigiit taama ikitsigaluta inoqammut maligassiuilluarneq tamatigit takutittanngikkipput. Immitsinnut inerteriinnarnata, uparuartuinnarnata, kamassaannarnata, malersuutiinnarnata, kukkunerisiuinnarnata, ila kinamigooq uppeqqaarneq, tamakkut pissutsit nakuusernermilluunniit ilaatigut annernarusarput, nakuusernermullu aallarniutaakkajuttarlutik, ingammi imigassaq aalakoornatoq annertuallaamik aalakoorniutaavallaarnerata kingunerani nakuuserneq aallartikkajuttartoq ilimagaara. Imigassaq qanoq atornissaanut inuiaqatigiittut kinguaatsinnut maligassiuinerusariaqartugut isumaqarpunga. Aamma inuit akornanni sallu atugaavallaartoq isumaqarpunga, ilaatigummi nakuuserneq aamma sallu peqqutaalluni aallartittartoq tusartareerparput. Ulluinnarnik inuk qanillugu



oqaaseqarfigingikkaluarlugu tassa facebookki aqputigalugu ajortumik ingattarsertullu allaaseralugu aallartipallareneqassaaq kammaasut ilaqutaasullu qisuariatitipallattarput sernersaallutik, nalligusullutik uffalu maligasiuilluarneqarsimasuuppata ajornartorsiut oqaloqatigiissutiginerisigut aaqitassaannaagaluaq sumorsuaq anngutinngikkaluarlugu inoqaterlu ajortumik isiginerlutsissanngikkaluarlugu. Makku ilai aappaqarniarlutik allasiortut, ilai ullut tamaviisa facebookkikku nakkarsaasut allaminnik qanorluunniit sakkortutigigaluarpata oqaasipiloqatigigaluarpataluunniit soqutiginnigatik gruppe sukkut tamaana arlaatigut inoqatiminni ikkatilliillutik allattut sakussaasaqaat, tassa aamma tamakkut nakuusernermut aallarniutaasarsinnaasutut ilimanaatillit. Ila aamma sorpassuusinnaapput ulluinnarni nakuusernermut aallarniutaasartut. Nakuuserneq pillugu oqallisiinnarata uagut innuttaasut iliuuseqarnerusariaqarpugut maligassiuinitsigut. Siunissamut ungasinnerusumut iluaqutaajumalluta eqqortumik maligassiuinertigut inuiaqatigiit tamatta sutigut arlaatigut sunneeqataasariaqarpugut. Ullut tamaasa oqarsinnaasariaqarpugut ullumikkut ulloq inoqatinnut ajunngitsumik maligassiuinermut atussavara,

Takorloorsinnaavara inoqartoq nakuuserernerup kingorna nakuusersimanerminik peqqissimissuteqartumi, imatut immaqa oqarluaannaraanni peqqissimiuannartumik, taamaakkaluartoq soorlu iliuutsit suqaluarpalluunniit aamma oqaatsit annernartut tunniunneqartut pillugit imminut kamassaqqittarnermigut nakuuseqqittartumik. Iliuserisimasani pillugit imminut qanoq tujorminartigisumik pinini eqqarsaatimini isiginnaartariaqarpaa, imminut qiviartarnissaq pisariaqassasoq ilimagilluainnarpara, qanoq amiilaarnarsimatigini ersinarsimatigininilu malugalugit eqqarsaatigisariaqarpai, oqarluaannaraanni imminut qiviartariaqarpoq imminullu ajunngitsumik pissuseqarnissamini iliuuseqarlunilu neriorsortariaqarluni ullut tamaasa allattuagassamini.

Naalackersuisut oqaatigaat kikkut tamarmik nakuusernertaqanngitsumik toqqissisimanartumilu nunatsinni ulluinnarni inuuneqassasut, taamaammat Istanbulimi isumaqatigiissut atuutinneqalernerisigut inuiaqatigiinni nakuusernerup pitsaaliorneqarnissaanut akiornissaanullu sunnuteqarluarnissaa kissaatigalugu Naleqqamiit siunnersuut ilalerparput.

Qujanarlu Naalackersuisut saqqummiussassinut.